



Jornal Independente · March 27 2014

Kazu CMATS Estraga Relasaun, Diplomata Austrália Laiha Etika

Husi: Julio da Silva

DILI: Ministru Negosiu Estranjeiru no Kooperasaun (MNEK) José Luis Guterres konsidera, deklarasaun diplomata Austrália ba kazu Certain Maritime Arrangement on the Timor Sea (CMATS) laiha etika, tanba la tetu desizaun molok fó sai deklarasaun ba imprensa (públiku).

Tuir deklarasaun diplomata Australia katak bainhira Timor-Leste ulun to'os atu kontinua lori kazu CMATS ne'e ba meja arbitrazen sei fó impaktu ba relasaun rai rua la di'ak iha futuru.

“Bainhira ema ruma ba iha Austrália, kuandu to'o iha ne'eba tau tiha gravadór, tau tiha instrumentu ruma iha Primeiru Ministru nia gabinete atu rona saida maka sai husi reuniaun, em partikularmente kuandu iha hanesan negosiasaun bilaterál ho kualker estadu nian ne'e, Austrália atu dehan saida loos?”deklara Ministru José Luis iha edifisiu sentru judisiariu Kaikoli horiseik.

Tuir Ministru Luis, Timor-Leste ne'e hanesan rai kiik, maibé Timor-Leste moris ho dignidade atu defende soberaniia no direitu povo no estadu Timor-Leste nian.

Tanba espionazen Australia hasoru Timor-Leste latuir direitu internasionál no konsensaun ne'ebé regula relasaun diplomatiku entre paisés iha mundu.

Ministru haktuir, iha loron hirak liu ba Primeiru Ministru Xanana mós kontinua fó korazen katak, TL lalika hakfodak tanba TL ne'e preparadu tiha ona, atu

hasoru rai ne'ebé de'it (bo'ot ka ki'ik) hakarak sama TL nia povo, la respeita

TL nia soberania, TL nia independensia, ida ne'e TL tenke hasoru duni.

Maski nune'e, Ministru ne'e fiar katak, relasaun husi nasaun rua ne'e sei kontinua metin no embaixadór Austrália mós sei iha Timor-Leste.

“Ha'u bele dehan ba imi katak ha'u la simu ema ida husi Austrália, lahatene kolega se ka kolega sira seluk, ha'u la simu deklarasaun ne'e, ne'ebé transmite informasaun ne'e depois imprensa tau (públika) ne'e hanesan ameasa ida. Ha'u hakarak hateten problema ne'e boot, maibé ita ba Austrália povu australianu sira aseita ho ita (Timor-Leste) nia ezijensia,”tenik Xefe Diplomasia ne'e.

Xefe Diplomasia ne'e mós promete sei uza meius diplomatiku hodi rezolve problema refere, liu husi Tribunál arbitrazen Internasionál, Haia, Olanda.